

## **1. UVOD**

Opšti sanitarno-higijenski uslovi su uslovi u pogledu lokacije objekta, okruženja, izgradnje, uređenja, snabdijevanja vodom, odvodnje otpadnih voda, uklanjanja čvrstih otpadnih materija, uređenja prostorija i opreme.

Da bi pravilno i kvalitetno funkcionisala, svaka vaspitno – obrazovna ustanova treba ispuniti uslove u pogledu projektovanja, građenja i korištenja istog. To se postiže uključivanjem velikog broja stručnih lica već prilikom razrade ideje koja je i polazna tačka u svakom projektu.

S aspekta higijene i zdravlja, što je ujedno jedan od najvažnijih segmenata školskih ustanova, vrlo je važno od ideje do upotrebe zadovoljiti sanitarno – higijenske principe. Ovi principi se ogledaju u adekvatnom izboru lokacije za školski prostor, pravilnoj orijentaciji objekta, temperaturnom, vazdušnom i akustičnom komforu, osvjetljenju objekta, ventiliranju školskih prostorija, snabdijevanju pitkom vodom, odvodnjom otpadnih voda, zadovoljenju kapaciteta, te pravilnom rasporedu školskog objekta i prostorija unutar njega.

## **2. CILJ RADA**

Cilj ovog rada je opisati sanitarno – higijenske principe koje treba zadovoljiti svaka škola, kroz primjer Katoličkog školskog centra u Bihaću. Počeci djelovanja Katoličke crkve na području školstva u Bihaću počinju još davne 1894. godine, a novi objekat izgrađen je 2009. godine i danas uspješno radi. Radovi na vanjskom uređenju nisu dovršeni, a izgradnja sportske dvorane se planira u skoroj budućnosti.

U radu će se prvo opisati principi funkcionisanja osnovnih škola sa aspekta higijenskih uslova, a onda će se isti uvjeti uporediti sa onima u Osnovnoj školi Ivan Pavao II koja je dio Katoličkog školskog centra Bihać.